

ke' kinhmgan na pagay 'Tayal

nanu squ raral mga, m'uy balay qqyanux na 'tayal ma. si giway musa  
lmamu' bway na qhuniq, ini ga musa kmyut yahuw, wasiq yasa qu sramat  
nha. nanu yasa qu ini ktngi' maniq krryax, m'uy balay qinnxan nha. si  
ga qnzyat musa hmkangi qsinuw ga yasa stngi' nha maniq. nanu yasa  
qu ptlu' squ mtkzyay ini qwalax bsyaq lga, ini uluw niqun ru nanu yasa  
qu 'san nha tbalung hmkangi hmnghung kmzyap kwara minqyanux nqu  
qulih llyung, kagang, kbolung yasa qu niqun nha la.

nanu squ minxal, pongan nha hngzyang kahul squ namuw, “gas  
gas” mucu ini rangaw. nanu yasa qu 'san nha mita mga, aw baq qoli maki  
kya. ana nha ssagun ga aki wayal ru mwah lozi ma. aki wayal ha, ru mwah  
lozi, yasa si nya laxi kya la. bsyaq hazi babaw nya llungun nha ru 'san nha  
mita mga, nyux mbhuyaw cingay hi' nha lma.

nanu yasa qu mpkayal qu qutux ngasal mucu “laxi ta ssawi la, siqan,  
nyux twaya maki sqani la” mucu mru si nha laxi kya ma. nanu yasa ini  
kbsyaq lga, yasa qoli kwara qu qsahuy na ngasal ru lingay na ngasal  
lma. ana yasa ga si nha laxi kya uzi.

nanu squ minxal, si kta wal si kongat qu qoli minaki kya ru si qlqala'

kwara nha ma, ru hkngyun nha lingay na ngasal ga ini  
nha 'lwi. 'san nha hmkangi zik na sakaw “kuna nyux mwah mshzi maki zik  
na sakaw” mucu ru hkngyun nha kya ma. ktan nha mga, ungat qu qoli hiya,  
ga ktan nha qutux k'man ka iyat nha kntan krryax ma. nanu yasa qu  
galun nha ru inblequn nha mita ga cingay balay bway nya nyux si tqopu ru  
nyux ki'an ngurus uzi ma. aw baq naras na qoli ru sni' nya kya ma. tlaman  
nha kmtu' ga sbing balay ma. “tlamay ta gmhap wah!” mucu mru sgchap nha  
tanux, ktan mga nyal hbku' kwara lru ki'a tehuk qu ryax nya lga tnaral  
lru mkhpah ru mkbway lma. nanu yasa qu puyun nha ru niqun nha mga  
sokan balay ru blaq balay niqun ma. aring kya maki qu pagay  
na 'Tayal, gaga' bnkis 'Tayal sraral ini nha qpuhi maniq qu pagay  
zik khu' uzi. qoli qani qu sthay nha cikay hmswa' ga giwan nqu lpyung ta  
qu qoli qani ma.

旱稻的故事

以前只能採嫩葉、野菜當食物。除非去狩獵才能吃飽。如遇乾旱，就去找溪中的魚、蟹、蝦子當食物吃。有次，屋頂傳來「卡斯！卡斯！」聲。原來是老鼠，後來繁殖很多小老鼠。家人說，不要把牠們趕出去，不久整個房子四周都是老鼠。有次，在家的老鼠都看不見，卻在床底下發現一根不曾看過的草。上面長滿種子，他們在室外播下，結果，所有的種子都長起來，含苞、開花、結果，煮來吃，吃起來又香、又好吃，從那時起就有了稻子。